

Nammineq kissaatiginngisaminnik meerartaarsinnaanngitsut Qallunaat Nunaanni IVF aamma ICSI-mik ikiorserneqarsinnaanngorlugit angalanermullu, najugaqarnermut, misissortinnermut aammalu ikiorserneqarnermut aningaasartuutit peqqinnissaqarfimmiit akilerneqartarnissaannik neqerooruteqartoqartalernissaa pillugu Naalakkersuisut peqquneqarnissaannik Inatsisartunut aalajangiiffigisassatut siunnersuut. Tamatumani siunertaralugu nammineq kissaatiginngisamik meerartaarsinnaanngitsut ilaqutariinnut inuiaqatigiinnullu iluaqutaasussamik nuannaarutaasussamillu meerartaarsinnaanngornissaat.

(Inatsisartunut Ilaasortaq Anna Wangenheim, Demokraatit)

Akissuteqaat

(Peqqinnissamut Naalakkersuisoq)

Siullermeerneqarnera

Nammineq kissaatiginngisamik meerartaarsinnaanngitsunut Danmarkimi IVF aamma ICSI atorlugit suliaritittarnissanik (reagensglas atorlugu suliaritittarneq) Peqqinnissaqarfiup neqeroortarnissaa pillugu Anna Wangenheimip Inatsisartut aalajangiiffigisassaattut siunnersuummik saqqummiussaanut Naalakkersuisut qujapput.

Ilaqutariinnik pilersitsinissamik kissaateqarneq aammalu nammineq kissaatiginngisamik meerartaarsinnaannginneq aappariinnut tarnikkut oqimaatsorsiortitsilersinnaammata Naalakkersuisut paasisinnaalluarpaat. Peqatigitillugu Naalakkersuisut siunnersuuteqartoq isumaqatigaat, innuttaasut ilaqutariittut pilersitsinissamik periarfissanik pitsaanerpaanik qulakkeerinninnissatsinnik suliaqartussaagatta.

Ullumikkut Peqqinnissaqarfik aappariinnut nammineq kissaatiginngisamik meerartaarsinnaanngitsunut suliaritittarnissamut neqeroortarpoq, tassanilu angutip arnallu nammineq kissaatiginngisamik meerartaarsinnaannginnerat misissuiffigalugu, hormoninik nakorsaasersuineq aqcutigalugu katsorsaaneq mannissat kaanngarnerat kiisalu anisuut aqcutigalugit siuarsaaffiusoq pillugu qulaajaasarneq neqeroorutaasarpoq.

Anisooq aqcutigalugu suliaritinneq iluatsissimangikkaangat Peqqinnissaqarfik siusinnerusukkut reagensglas atorlugu suliaritittarnissanut innersuussisarsimavoq, tassani mannissat arnamit peerneqartarput, illissap avataatigut mannilerneqartarput kingornagullu illissamut ileqqinneqartarlutik. Suliaritittariaaseq tamanna qaffasissumik immikkorluinnaq ilisimasaqarfigineqartariaqarluni suliassaavoq, piginnaasallu atortullu nunatsinni pissarsiarineqarsinnaanngitsut tamatumani pisariaqartinneqarput.

2019-imi aalajangerneqarpoq Danmarkimi reagensglas atorlugu suliaritittarneq pillugu Peqqinnissaqarfiup neqeroortarnera unitsinneqassasoq. Taamanikkut aqqiussuusaq taanna

Peqqinnissaqarfiup suliaritinneq nammineq aningaasalersorpaa, kisianni aappariit angalanertik najugaqarnertillu nammineq aningaasalersussavaat. Aaqqissuussineq ilaannakortumik aningaalersugaalluni inerteqqutaammat kiisalu innuttaasunik assigiinngissitsinermik kinguneqartarmat unitsinneqarsimavoq. Peqatigitillugu reagensglas atorlugu suliaritittarneq pillugu neqeroorummik tamakkiisumik aningaasalersorneqartumik pilersitsinissamut Peqqinnissaqarfik aningaasassaqaarsimanngilaq.

Soorlu siunnersuuteqartumiit erseqqissarneqartoq nammineq kissaatiginngisamik meerartaarsinnaannginneq nappaataavoq, tamannalu WHO-p nappaatit suussuserneqarneranut allattorsimaffianni nassaassaavoq. Peqqinnissaqarfik WHO-p nappaatit suussuserneqarneranut allattorsimaffik atortarpaa, massakkulli suliaritittarnerit pissarsiarineqarsinnaasut tamakkerlugit aningaasalersuiffiginissaat periarfissaanngilaq, tamatumani ilaapput angalanerit aamma najugaqarnerit. Peqqinnissaqarfimmi killilimmik aningaasaqarniarnerup kingunerisarpaa katsorsarneqarnissamut neqeroorutit ilungersunartumik pingaarnersiuisariaqalernermik.

Peqqinnissaqarfiup missingersimavaa aappariit 40-t ukiut tamaasa reagensglas atorlugu suliaritittarnissanut innersuunneqarsinnaasasut. Naatsorsuinerni nutaani paasinarsisimavoq ukiumut Danmarkimi reagensglas atorlugu suliaritinnissanut neqeroortarneq 8.750.000 kr.-ninik akeqartassasoq. Nammineq kissaatiginngisaminnik meerartaarsinnaanngitsunut neqeroorutit Naalackersuisunit amerlineqarnissaat kissaatigineqaraluartoq, siunertamut aningaasaliisoqanngippat, tamanna periarfissaanngitsutut nalilerneqarpoq.

Naalackersuisut ilisimavaat apeqqut aningaasanut inatsit pillugu isumaqatiginninniarnermi qaqinneqarsimasoq, suliniummullu aningaasalersuinissamik nassaartoqassagaluarpat Naalackersuisut soorunami tamatuminna naleqqussaassapput.